

## Abseidisch

Frieher hawwe merr bei su emm Fußballspill wie omm letzde Somsdaach sesomme-gesotze, de Schorsch unn isch, hawwe e Flasch Bier gedrunke und warn jedes Mol außem Heisje, wenn die Deutsche e Door geschosse hawwe. In dene Coronazeide, die joo immer noch nitt vorbei sinn, wollde merr dess nitt mache, aach weil vumm Schorsch zwaa Enkel bei de Oma Kättche unn beim Opa Schorsch gewese sinn, die nodierlich aach Fernseh gugge wollde.

Su iss uns nix onnersders iwwerisch gebliwwe, als nooch emm Spill ze telefoniern.

Noochdem merr uns begrießd unn uns gefreid hadde, dass unser Monnschaft gut gespilld unn verdiend geesche die Portugiese gewunne hadd, habb isch de Schorsch gefroochd: Saach emol, konnsd du merr erklörn, was Abseits iss?

Heer merr uff, seet de Schorsch, weil dessellwe hott misch aach ooner vunn moine Enkel gefroochd unn isch musst zugewwe, dass isch dess nitt genau waaß.

Isch saach: Isch habb gelese, dass dess ersde Door vunn dem Gosens nitt gegolle hott, nitt weil de Gosens im Abseits gewese war, naa, weil de Gnabry bei dere Flank vumm Ginter, ohne iwwerhaupt de Ball beriehrd ze hawwe, dorsch soi Beweeschung ins Spill oigegriffe hädd unn in dem Aacheblig im Abseits war. Also dess soll verstieh wer will, isch nitt.

De Schorsch druff: Isch aach nitt, awwer gugg doch emol im Internet.

Unn genau dess habb isch gemachd, habb nooch dere Abseitsreeschel gesuchd, habbe gefunne unn muss saache, isch bin genau su schlau wie vorher. Weil isch gedenk habb, die Reeschel dut aus oom oonsische Satz bestieh, der heeßt: *„Ein Spieler befindet sich demnach in einer Abseitsstellung, wenn er der gegnerischen Torlinie näher ist als der Ball und der vorletzte Gegenspieler (inklusive des Torwartes); beim Abseits zählt der Zeitpunkt der Ballabgabe und nicht der Zeitpunkt, wenn der sich im Abseits befindende Spieler den Ball erhält.“*

Ferr misch heeßt dess, dass wenn ooner de Ball nooch vorne schieße dut unn in dem Aacheblig iss de eischene Monn hinnerm letzde Feldspiller vumm Geeschner, donn isses Abseits unn dess isses joo, was die im Fernseh immer zeische dun mett su ooner Linie, wo merr dess genau sehe kann. Awwer donn duts enn Haufe Ausnahme vunn dere Reeschel gewwe wie die mett dem Gnabry. Im Spill sieht merr joo effderr, dass aach de Schiedsrichter sich nitt immer uff soi Fähnscheschwenker onn de Linie verlosse will unn ze vestieh gibt, dass vumm Video-Assistent in Köln e Bestädischung brauche dut. Er mächt donn mett soine Händ su Beweeschunge wie moi Fraa, wenn isch hinne im Gadde bin unn sie merr oozeische will, dass e Paket kumme iss. Unn su isses aach koo Wunner, wenn iwwer dess oone odder onnere Abseits nooch su emm Spill die Spezialisde heffdisch dischpediern. Gewiss iss dess meddem Abseits e bissi vill abseidisch.

Was isch aus moim Noochgugge gelernd habb dess iss, dass isch e bissi was kabierd habb, awwer sunnst, onnersders wie die gons Zeit, ohne ze schenne wenn su enn Schiedsrichter Abseits peift unn doodemett aach e Door nitt oerkenne dut, oofach wadd wies weidergieht. Schließlich sinn joo weesche Abseits auch zwaa Doorn vunn dene Fronsose nitt gewwe worm unn dass unser Leit dessdeweesche nor mett Oons-Null verlorn hawwe.

Eiern Honnes